



**B**oerobista uir armorum usu & prudentia singulari magnum sibi apud Orientales Germanos nomen comparauit, eo tempore cum Iulius Cæsar & Pompeius ciuile bellum cepissent. Itaque is omnium consensu à suis rex declaratur. Is statim suos populares, præsertim Dacos & Getas, crebris hæctenus bellis attritos, uictus sobrietate & obedientia recreandos curauit, & quotidiana armorum meditatione, laborumque patientia instructos eo promouit ut facile cæteris Germaniæ populis uirtute anteirent. Usus est auito more gentis sacro consultore uateque fatidico Diceneo. Huius persuasione uites excisæ, uitamque abstemiam sine uino agere decretum. His bonis suorum artibus Boerobista fretus, latissimum intra paucos annos imperium peperit.